

# Papur y Plwyf

Papur lleol electronig plwyf

Llangynnwr – Llangynnwr's local electronic paper

Rhif 11 Ionawr 2012 January No. 11

Bydd Papur Y Plwyf yn son am ddigwyddiadau a phersonoliaethau yn ein cymuned. Os ydych am dderbyn copi, anfonwch eich cyfeiriad e-bost at [papuryplwyf@hotmail.co.uk](mailto:papuryplwyf@hotmail.co.uk)

## Plismon lleol poblogaidd yn symud ymlaen

Bydd y plismon lleol, Mike Richardson yn gadael Llangynnwr yn y flwyddyn newydd er mwyn dechrau dyletswyddau yn agosach i Lanelli. Yn wreiddiol o'r West Midlands, gwasanaethodd Mike y gymuned ers dros dair blynedd.

Bu Mike yn gweithio'n agos gyda'r ysgol a phobl ifanc yn y gymuned ac fe'u clywyd yn dweud yn aml bod yn well ganddo roi'r ifanc ar drywydd gwell na rhoi record troseddol iddynt.

Gweithiodd Mike yn agos gyda'r cyngor cymuned hefyd a bu'n ddyfal yn mynd ar ôl materion a godwyd yn ystod y cyfarfod misol. Diolchodd cadeirydd y cyngor, Alun West iddo am ei ymroddiad a'i waith yn Llangynnwr mewn cyfarfod diweddar a dymunodd yn dda iddo yn ei swydd newydd.

## Cynghorydd Sir yn cyhoeddi ymddeoliad



Cadarnhaodd y Cynghorydd Merlin Jones, cynrychiolydd Llangynnwr ar y cyngor sir fel cynghorydd annibynol, na fydd yn sefyll etholiad yn yr etholiadau ym mis Mai. Cynrychiolodd Merlin Llangynnwr ar yr hen gyngor dosbarth Caerfyrddin am nifer o flynyddoedd cyn dod yn Cynghorydd Sir yn 1993.

Am nifer o flynyddoedd, bu ef a'i ddiweddar wraig, Audrey'n rhedeg y siop a'r Swyddfa Bost yn Llangynnwr.

Ei brif ddiddordebau fel cynghorydd oedd materion yn ymwneud â'r gymuned. Adnabyddwyd y Cyngh. Jones fel un a fu'n llwyddiannus yn delio a gofidiau pobl leol gyda'r Cyngor Sir. Pan ofynnwyd iddo am ei uchafbwyntiau yn ystod ei gyfnod yn y swydd, atebodd Merlin mai'r cyfleoedd a gafodd i gefnogi'r ysgol a materion Llangynnwr a roddodd y mwyaf o falchder iddo. Roedd y Cyng. Jones hefyd yn aelod o lywodraethwyr Ysgol QE High ac Ysgol Llangynnwr. Roedd hefyd yn gyn-gadeirydd o'r Cyngor Cymuned.

Yn ddiweddar, gwerthwyd cadwyn siopau Comet am ddwy bunt i grwp ecwiti preifat Hailey. Bwriedir ailstrwythuro'r gadwyn sydd â £100m o rwymedigaethau, 10,000 o weithwyr a 250 o siopau gyda cholled o 25 o siopau dros y tair blynedd nesaf. Un o'r rhai hynny oedd siop Pensarn a gaewyd cyn y Nadolig. Mae hyn yn dilyn colled Allied Carpets a siop Focus a leolwyd yn yr un rhan o barc busnes Ffordd Steffan gyda cholled o gyfanswm o 40 o swyddi.

## Cefnogaeth leol i'r gwn cyflymder

Cynigiodd trigolion ar Heol Llangynnwr gael hyfforddiant i ddefnyddio gwn cyflymder yr heddlu er mwyn gwneud arolwg answyddogol o gyflymder traffig yn y rhan 40mya ychydig i lawr y ffordd o bencadlys yr heddlu. Byddai canlyniadau'r arolwg yn cynorthwyo'r heddlu i weld ble mae gor-yrru yn peri gofid i'r gymuned leol ac i ychwanegu'r safle i'r rhestr o leoliadau a ddefnyddir yn barod gan yr heddlu i gynnal archwiliad ar hap i fesur cyflymder cerbydau yn y dyfodol.

Ar hyn o bryd, mae'r heddlu'n defnyddio'r gwn ar Riw Babell a Heol Blaengwastod.

## Ad-dalu benthyciad

Ad-dalwyd benthyciad oddi wrth y cyngor Cymuned i bwyllgor parc Llangynnwr. Roedd y benthyciad yn gymorth i'r pwyllgor ymgeisio am grantiau i dalu am welliannau i'r parc. Yn ystod cyfarfod mis Rhagfyr, cytunodd y Cyngor i ddefnyddio'r arian i wella mynedfa'r parc.

**H.I. EVANS & FEIBION**  
**Llaethdy Penymorfa**  
**Llaeth Ffres Pasteuredig o'r Fferm**  
**Papur Newydd**  
**Hufen ac wyau ffres cludiant dyddiol**



MUDIAD YSGOLION MEITHRIN

## Cylch Meithrin Llangynnwr

Dydd Llun, Mawrth, Iau a Dydd Gwener (Mon, Tues, Thurs & Fri)

9.00 – 11.30 £2.50 sesiwn

**Ysgol Llangynnwr**

## Cynlluniau ar gyfer llwybr newydd

Fel rhan o gynllun trafndiaeth i'r ysgol, bydd llwybr troed yn cael ei greu o Ysgol Llangynnwr i waelod Rhiw Babell. Bydd y llwybr yn gwella diogelwch yn yr ardal yn sylweddol. Bydd y cynllun hefyd yn arafu'r cyflymdra ar ran orllewinol lôn Penymorfa i 20mya. Croesawyd y prosiect gan y Cynghorydd Geraint Bevan, ond anogodd y cyngor sir i ystyried ymestyn y cyfyngiad cyflymdra 20mya i'r lôn gyfan fel bod y rhan beryglus ddwyreiniol o'r lôn yn cael ei chynnwys hefyd. Anogodd drigolion lôn Penymorfa i gyfrannu i'r ymgynghoriad a gynhelir ar hyn o bryd.



Y cynghorwyr lleol Elwyn Williams a Geraint Bevan yn sefyll ar ran gul lôn Penymorfa gyda'u deiseb i wella diogelwch ar y lôn.

### Diolch am y goeden Nadolig

Yn ystod seremoni cynnau'r goleuadau Nadolig ar y goeden, diolchodd y Cynghorydd Alun

West i Mr. a Mrs. Elfi Evans am eu rhodd o goeden Nadolig i Llangynnwr. Dyma'r seithfed tro i'r teulu roi coeden i'r gymuned.

Bydd y cyngor cymuned yn gwneud cyfraniad o £100 i'r Uned Oncoleg yn Ysbyty Glangwili i nodi'r rhodd.

### Llinellau Melyn ar gyfer Pensarn

Mewn cyfarfod diweddar o Gyngor Cymuned Llangynnwr, croesawodd y Cynghorydd Robin Griffiths, sydd wedi bod yn ymgyrchu dros wella adnoddau parcio ar heol Pensarn, benderfyniad y Cyngor Sir i beintio llinellau melyn y tu fas i'r lle busnes.

### Ymgynghoriad Traffig

Gan ddefnyddio arian o'r Gronfa Trefi Cynladwy, gwnaeth y Cyngor Sir gais i wella cysylltiadau trafndiaeth â Llangynnwr.

Byddai'r cynllun yn gwella llwybrau troed o Fryn Tywi ac Awel Tywi i Heol Llangynnwr.

Awgrymwyd gwelliannau i'r manau croesi'r ffordd yn Sticle Bach a'r parc.

Cynlluniwyd cysgodfa beiciau ar gyfer y parc a dau le yn Nhregynnwr.

Ystyrir arosfeydd bws gwell yn Nhir Ysgawen a'r Aelwyd gyda phalmant uwch yn y ddau le.

Mae manau croesi gwastad uwch ar Rhiw Babell ger y capel ac yn agos at y gyffordd gyda Bryn Meurig hefyd yn cael eu hystyried.

Daeth nifer o bobl i gyfarfod gyda swyddogion y cyngor yn Yr Aelwyd ym mis Rhagfyr i drafod y cynlluniau gyda'r trigolion lleol. Rhaid i'r cynlluniau terfynol a'r gwaith gael eu cwblhau erbyn Mawrth 2012.



### Mynyddoedd Ia ar yr afon Tywi?

Llun o hen bont Caerfyrddin gyda ia trwchus ar yr afon Tywi. Credir i'r llun gael ei dynnu yn ystod oerfel difrifol 1927. Caewyd y rhan fwyaf o dde Cymru gan storm eira ar ddydd Nadolig y flwyddyn honno. Gwelwyd golygfeydd lleol tebyg yn ystod dechrau mis Ionawr 2010 a 2011 pan aeth y tymheredd o dan y rhewbwynt.

### Cywiriad

**Sylwodd tri phar o lygaid barcud ymysg ein darllenwyr mai tad-ying -nghyfraith Dr. Margaret yn hytrach na'i thad oedd yn y llun hanesyddol y mis diwethaf.**

### Cymorthfeydd Lleoliad yr Heddlu

Bob dydd Mercher yn archfarchnad Morrisons rhwng 15.00 a 16.00.

Yr Aelwyd, Tregynnwr bob dydd Llun rhwng 16.00 a 18.00.

### Mygiau ar gyfer plant

Penderfynodd Cyngor Cymuned Llangynnwr ddathlu'r Jiwbill Brenhinol gyda rhodd o fyg coffaol i bob plentyn oed cynradd yn y gymuned.

### Cytuno ar flaenoriaeth gwaith traffig

Cytunodd y Cyngor Sir roi arwyddion blaenoriaeth traffig ar y bont dros yr afon Pibwr rhwng Bolahaul a Chwmffrwd. Disgwylir i'r gwaith ddechrau o fewn yr wythnosau nesaf.